

Atan Lee preocupa cu criminalidad

Pueblo mester uni den e problema nacional pa logra un solucion



ORANJESTAD - E conocido ciudadano Atan Lee durante un conferencia di prensa ayera tardi a haci un apelacion na ciudadanonan pa uni den e 'Comision Ban Salba Aruba' cual lo bai organiza manifestacionnan contra di

criminalidad cu ta dominando nos isla y cu ningun hende ta tripi di haci algo contra tur e ilegalidadnan aki.

Atan Lee Diabierna anochi un biaha mas a bira victima di atracadornan (2), kendenan arma cu revolver a tira un pará

riba su negoshi (restaurant) na Bubali. Y esaki ta sin contanto e tantisimo biaha cu a ser hortá na su cas, y caminda cu te cu awe ningun di e casonan a ser solucioná.

Tur esaki y combina cu e miedo cu e ta mira cu e hendenan ta bibando aden, el a dicide pa haci algo, specialmente awor cu e ta bai baha cu VUT. Como un ciudadano ehemplar, e ta prefera pa traha pa yuda trece e moralidad y respet bek, enbes di dedica su mes na e dos bukinan cu e tin pendiente pa scirbi.

Lee tabata muestra basta preocupa pa e situacion reinante, caminda hopi hende no ta haci nada. Mester corda, Lee a bisa, cu Aruba no ta di e politiconan 'pero di nos tur'. Cu hopi sentimento Atan Lee a papia di e lucha cu Aruba a hiba pa haya su Status Aparte, unda cu tur hende a uni forza pa logra e meta aki, esta libertad for di Antiyas, 'caminda paz y libertad lo bai existi. Pero lamentablemente awor e pueblo ta confrontando e problema cu nan a perde nan libertad personal na man di

delincuente nan, caminda e cas di e Arubianonan ta wordo atacá." El a muestra cu tur caminda por tende 'nos no por mas cu e intrankilidad reinante'.

'Esaki no ta e libertad cu nos merece di haya.'

El a muestra cu criminalidad ta un problema nacional, cu ta afectá un y tur, y caminda cu tur hende mester hala faha mara y traha hunto pa solucioná e problema grandi aki. El a muestra cu nunca antes Aruba a haya su mes confronta cu problemanan grandi di criminalidad manera tin aworaki. 'Tur esaki ta consecuencia di e lucha di poder cu nos tin actualmente den nos comunidad; e lucha pa keda na poder, no pa salba nos comunidad. E constante pelea, confrontacion cu tin serca e politiconan, esnan cu mester ta e ehempel pa sigui.' Por ehempel el a mencioná cu un reunion di Parlamento ta algo cu niun hende cu dos placa di sinti lo sinta scucha mirando con e hendenan ta actua eyden. 'Parlamentario nan simplemente ta traha pa busca nan salario fin di luna, y pa bai entierro tur merdia, por lo demas

nada mas. Nada ta wordo haci pa e comunidad. Niun hende a studia pakico tin asina hopi caso di suicidio; parce cu niun hende ta preocupa pa e motibonan di e problema social aki.'

Atan Lee a bisa cu corriendo rond, tur hende por mira cuanto lugar ilegal tin, chozanan ta bira negoshi, pero no tin control di hygiene, ni di permiso. Hasta autoridadnan ta para cumpra cuminda na un di e lugarnan ilegal, sin puntra pa e permisonan necesario. 'Ken ta stop esaki. Niun hende tin e corahe di paré, pasobra ta perde voto di e famia. Mi ta haci un apelacion na tur gremio, politiconan y Parlamento, pa ataca e problema aki promer cu e bira mas grandi. No traha solamente pa e pensioen.'

Un di aspectonan cu por yuda den e problema di criminalidad ta asociacion di bisiñanan, pa biba cu otro y di e manera aki ta yuda evita e ciudadanonan bisiña ta bira victima di delincuente nan.

Atan Lee ta haci un apelacion na tur esnan cu kier traha hunto cune den e 'Comision Salba Aruba', sin ningun intencion politico, pa yame na tel. 878087.